

求恕齋  
叢書

雪橋詩話續集

五

雪橋詩話續集卷第五

遼陽楊鍾義撰集

吳興劉承幹參校

金檜門總憲贊於構李汪氏讀書鐵舟園甥館汪鶴桴  
范湖老宿也盡窺其藏書丙辰以中翰中式出松泉汪  
文端之門廷試擢第一入直內廷屢典試事詩宗韓黃  
常與錢汪相提唱蔣茗生張瘦銅奉瓣香焉其說詩謂  
文詞之要古人所以不朽者只一切字切則曰新而不  
窮否則牽附粉飾外強中乾貌腴神悴苟知切之爲用  
則變化卷舒象外箇中開闔無盡第各就學識才分成

其小大若浮夸以侈規模狹隘以詡矜貴是皆虛車也  
其詩自題曰詩疑今刻曰詩存非先生志所刪亦多不  
當故瘦銅有太元不副故人求之歎吾愛其劉表傳云  
苦費書詞譬二袁自家豚犬向誰言鹿門未達高人旨  
何處荊州遺子孫讀閒居賦云宦情巧拙細爲分養志  
須知在守身乾沒到頭成大負版輿安否太夫人

劉震東郊謂粵東之屈開闢而麤新城之王娟秀而弱  
薦青先生五言近體似初唐古則旋轉如意大開大闔  
嘗讀看花什至山深造化全而老友宋介山適至擊節  
云此唐人所未道薦青次韻答劉東郊云名剗消磨短

袖中疏狂直與古人同獨來窮巷知何好深喜青尊且  
未空一夕寒鐙疑夢寐十年長劍笑英雄驚鳥斷雁休  
相亂好聽鄰雞唱曉風鴈青貧而隱東郊貧而客情山  
水而性風雅則同宜其論詩之有合也

大谷山堂詩有極近王韋者薄暮至萬松寺云山翠昏  
陰崖雲際聞孤磬怖鴿驚深叢枯筇響蘿徑松關晚森  
肅荷衣拂深淨日落山風吹琴筑灑深聽不見湯惠休  
秋巖發高詠曳屐循道門簷閒數峰暝秋夜寄石堂云  
嘉樹昏夕陰松際上初月澄輝動疏牖遙見數螢沒夜  
靜寒露下微響出深樾窮巷數犬吠幽蟲語初歇支枕

澹相思坐聽孤鐘發

乾隆壬戌邵叔旡以進士廷對錢文端奉命讀卷獨賞其書嘗爲叔旡書朱子小學題詞叔旡獻長句二首云  
尙書榮遇冠儒臣食祿家居寵眷頻兩浙東西推大老  
一湖煙水作閒人竝游英俊歸陶鑄得意文章泣鬼神  
白髮門生偏有幸退耕仍得近清塵箋素堆牀老愛書  
行閒筋骨壓嚴徐慚無左紙供揮翰幸有羊裙乞滿裾  
親示箴規進庸惰謬將醇謹獎迂疏平生話契緣豪末  
敢忘彤墀對策初比年內閣大庫散出殿廷試卷行款  
疏落字體皆不失楷法初不類咸同以來競尙平滿光

圓致有匠書之謂余素不工院體書潘文勤師獨見賞  
拔謂有書味廿餘年來學書不進殊自恧也

純廟御極安平陳聖泉以孫文定薦起廢籍知登州監  
司河上顧用方總漕陞見奏稱陳法前知順德立鄉長  
行保甲繁簡得宜時廬鳳數遭水旱民轉徙戶口難稽  
特調廬鳳道行其法清釐之文定進呈其前官運河道  
所著河干問答至是調淮揚道尋改大名道未任以河  
工濱海防決謫軍臺請贖得歸陳文恭稱其於得失榮  
辱之際正范文正所謂如四時寒暑之過乎吾前豈有  
二心者及詔舉經學以其深於易薦於朝復爲序所著

易箋其奉 旨回籍題壁云到來已覺人情熟歸去翻  
憐惜別頻小大殷勤奉杯酒再來真笑惠州人鮑雙五  
謂先生潛心理學而不流爲擊壤一派弟浩字雨泉以  
循良稱知昌平時內務府奏凡民違例典買旗地悉查  
撤還旗雨泉獨抗爭曰旗漢皆 皇上赤子漢民處圈  
外無恆產旗民以地誘之今旗民白手圖歸而漢民銀  
地兩失 聖明豈不念閭閻疾苦乎府尹以聞得 旨  
下戶部委員會同更正令旗人典賣時日淺者追全價  
稍久者追半又久者不追還著爲令

詠黔中種人者以田端雲余鳧山竹枝詞爲最端雲詩

作於康熙辛丑謂九股苗善造強弩名偏架狹家苗多  
伐人冢墓羅羅別有文字曰鬼書紫薑苗以十一月朔  
爲節自元旦起忌門凡二十七至元宵始相往來苗人歲  
時召親戚俱撾銅鼓爭訟不入官府推其屬之公正善  
言語者曰行頭鳬山謂羅鬼長死耐德卽爲女官耐德  
其妻也朱家蔡家二種相傳皆宋人蔡人爲楚所俘放  
之南徼遂流爲夷猺人居處必擇谿邊近水者以大樹  
皮接水至家不用桶汲常采藥行醫歲節祀槃弧僰人  
在普安州近雲南境多松樹山茶凡狹人狡猾羅羅不  
能相識者常以僰人通之車賽苗男子多技婦人工繡

前此馬三保之兵曾遺六百人於此與苗人爲壻遂成  
苗故又稱六百戶生苗遵義李丹梧孝廉有苗爾雅雲  
夢安曉珊有黔南雜詠四十六首寫苗疆風俗甚詳  
湖北長樂地在萬山阻絕人境元以前爲蠻荒明初置  
土官以羈縻之 本朝雍正十三年始改土歸流土官  
多尙武略容美田氏頗事詩書以詩名者自九齡始萬  
厤閒補諸生兩都名彥多與倡和有紫芝亭集武昌吳  
明卿爲之序田元太初子需霖雙雲旣霖夏雲甘霖特  
雲相繼爲宣慰使均有集太初甲申除夕感懷詩序云  
歲運趨於維新老人每多感舊余受先帝寵錫實爲邊

臣奇邁赤眉爲虐朱茀多慟悲感前事嗚咽成詩以示  
兒子輩各宣欲言遂相率步韻命曰笠浦合集其詩云  
飛光悲臘盡一夕尙今年坐歎龍髯渺誰攀羲轡還舊  
恩難遽釋孤憤豈徒懸縱說青陽好笙歌輶市蜃兒童  
未解意柏酒過相勞曾飽誰家粟難看改歲桃酸心聽  
畫角伏枕厭鈴鼙逆數經年過驚蓬轉泛舟終歲蹉跎  
晚重新可奈何愁先青鳥至眼轉白駒過往事歸春夢  
流光付逝波未堪言代謝意氣隱銷磨隔宿分新舊斯  
時匪往時閒心嗟過客冷眼盼殘棋虛抱三閭憾難將  
一木支許多慷慨意寂寂壓雙眉燈燭輝如晝庸關守

歲心繁華暗欲歇歌鼓漫催深柏酒仍同昔辛盤少頌  
今等閒佳節候歡喜變悲吟太初弟圭特夫尤崇尚風  
雅子商霖珠濤亦能詩特雲子舜年嘗徵江漢名流輯  
廿一史補遺日自課某日讀某經閱某史至某處用小  
印志之有白鹿堂集歡餘吟清江紀行等詩稿云亭山  
人謂其每宴客必命家姬奏桃花扇田泰斗讀九峰公  
一家言曰橫絕英雄筆千霄氣象遒一朝弘典策半部  
小春秋宣慰邦之彥將軍儒者流摩崖碑在否洞口水  
悠悠欲徵千古信須備一家言石走星胡墜詞荒事莫  
論汗功收塞外血淚灑都門如此忠勤蹟差堪示子孫

我亦周遺子豪情鄙孟嘗葵心甘向日槐穴恥稱王雨  
露熙朝渥衣冠漢代香抱經懷祖德非敢騁詞場九  
峰舜年號一家言者田氏家集也以槐穴句考之蓋作  
於歸流以後在乾隆初矣

王東激青山莊記謂青山在常州之江陰距府數十里  
方伯張公別墅在府治北郭取以名其莊案方伯名括  
字叔度蓋文貞公之孫天門學士之子也自京口移家  
於此中有樂是軒人稱樂是先生莊故主吳氏宜興相  
婦翁也吳有季女死於此時時形見雖屢易姓皆祠其  
木主云厲太鴻詩入門先見水宛似在濠梁林影橫煙

艇流文照畫廊清華從此始崩剝勢難忘客路偏佳境  
尤宜勝侶將縱步平橋上空涼得最多俯窺開弱藻交  
語出喬柯尙記橫塘夢如聞子夜歌何當逢吉語來看  
颺新荷升降疑無極岡巒望更寬頽陽一枝塔飛翠幾  
層闌樹杪吳天盡窗中春事殘米囊花滿眼應是勸加  
餐前朝丘壑擅人說兩愚公物力爲山盡經營易主同  
客歸書閣閉鳥下石枰空游興兼離緒分襟向晚風錫  
山鄉彥吉爲園名愚公谷此莊初主吳服于亦號愚公  
也方伯弱冠能詩文善書法兼工繪事世宗御極以  
大臣後裔召賜顧問由刑部員外授陝西督糧參議薦

至直隸布政使秉性豪放無緣飾招延賓客榜門有詩  
酒可共語乾隆閒忤當事以居鄉不法入奏身罹重辟  
家產籍沒青山莊遂鞠爲茂草壁閒所嵌晉宋名碣皆  
爲灰粉所汚當事公讌必設席於此馮孟亭詩層層麥  
浪涌春田小徑榮紆謝墅前夾岸通橋平似掌沿隄壘  
石亞於肩林藏巖洞深逾秀花帶煙雲澹倍妍最愛流  
波渺無際遙汀微露釣魚船芳園歲久如圖畫金碧當  
初枉鬪奢老樹閱人更幾姓修篁避俗自成家雨淋敗  
檻藤浮沼風撼虛堂燕集沙猶有野農能好事菜畦留  
得牡丹芽塔鈴喚醒世閒人名勝惟餘現在身粉壁縱

橫塗短碣酒觴稠疊展新茵平泉花木徒勞記金谷繁  
華早化塵南望故鄉懷倦圃雪中鴻爪有前因末韻謂  
曹秋岳倦圃亦屢易主侍御嘗僦居其中

安南故交阯也其王黎氏受封 本朝時莫元清據高  
平亦受都統職屢構兵旣攻取高平至乾隆初遺孽未  
靖丁卯九月交人夜逐莫黨薄我歸順州更漢卡之塞  
垣戍卒聞聲協捕時方昧爽兵匪雜沓交人誤殺戍卒  
二人掠去三人詰曰知爲我兵也函其級及所掠以還  
事聞於朝念其恭事百年不卽加誅但勒其獻凶正典  
戊辰秋其王遣高平督鎮武廷蓉械囚三人送至境沈

幼堂方抵任左江奉檄鞠囚卽日赴歸順之鼓架卡其  
地切臨交境崇山密箐伐竹木爲堂夷官止其從人於  
外屏息進匍伏請命勞以牲醴頓首而去勘問三犯具  
狀請 旨事竣署鎮安守許守朝以六詩紀其事安南  
貢使四人一正使一內官二行人皆烏紗緋袍金帶阜  
鞚以俗以披髮爲恭跋蹠階下行三叩首禮予之屬就  
地旁坐飲之茗起謝戊辰正使阮宗圭服孔雀補通事  
傳其言蓋某科會元官戶部侍郎其國取士以詩賦策  
論官秩崇卑一奉天朝品制以戊辰之春入鎮南關下  
尋梧泝漓江渡洞庭繞長江達折津至都庚辰二月還

國蓋兩年也太平龍州設三關正南曰鎮南惟貢使出入迤西曰水口曰平南商人執照往來

吳江王藻載揚王樑緝庭稱平望二王緝庭性至孝於先墓側築月湖丙舍孺慕不衰詩高淡尤長五古雜詩云知者事結駟愚者事灌園所稟一以異所營遂以分二者途固殊要各全其天違已則交病形豈逐物遷介焉安其分鼓腹農圃閒載揚詩如題雪朝蘭社圖云數筆崇蘭留紙上可憐都似夕陽紅殊有意致圖爲崇禎十四年冬顧眉生畫阮大鋮賦詩西疇方氏所藏

華亭戴酉樵孝廉名其集曰甘所取昌黎零落甘所丁